

Ketua Umno bahagian berkumpul tanda sokong Najib
Malaysian Insider
Aug 28, 2014
Oleh The Malaysian Insider

Kira-kira 160 ketua Umno bahagian dijangka berkumpul di Putrajaya hari ini bagi menunjukkan sokongan kepada kepimpinan presiden parti Datuk Seri Najib Razak, satu langkah yang dilihat sebagai mencerminkan serangan Tun Dr Mahathir Mohamad terhadap perdana menteri tidak mendapat sokongan dari dalam parti.

The Malaysian Insider difahamkan pihak penganjur cuba mendapatkan semua 193 ketua Umno bahagian hadir memberikan sokongan kepada Najib, yang mula mengambil alih jawatan tertinggi Umno itu pada 2009 daripada pengganti Dr Mahathir, Tun Abdullah Ahmad Badawi.

"Kita dijemput untuk menunjukkan sokongan. Saya fikir sekurang-kurangnya 160 akan hadir," kata seorang 'panglima perang' Umno kepada The Malaysian Insider.

Sumber lain berkata, langkah itu bertujuan memencilkan Dr Mahathir dan kritikan yang dibuatnya melalui blog pada 18 Ogos terhadap Najib, yang dilaporkan secara meluas dalam portal berita tetapi tidak disiarkan media arus perdana.

Seorang sumber Umno berkata, beberapa pemimpin Umno memberi maklum balas terhadap kritikan Dr Mahathir walaupun dalam cara berdiplomasi kerana mereka ingat bagaimana serangan beliau terhadap Abdullah sehingga membawa kepada peletakan jawatannya pada 2009.

"Umno bersikap hati-hati dengan Dr Mahathir tetapi ketua bahagian ingin memberitahu mereka gembira dengan Najib," katanya.

Dalam blognya, Dr Mahathir menyelar pentadbiran Najib dan mengumumkan menarik balik sokongan kepada beliau kerana kesal tegurannya tidak diendahkan.

"Saya cuba menyampaikan pendapat saya secara langsung kepada Datuk Seri Najib.

"Saya tidak ada pilihan selain dari menarik balik sokongan saya. Ini pun tidak berkesan. Oleh itu terpaksa saya menegur," tulis Dr Mahathir di blognya chedet.cc.

Dr Mahathir turut berkata prestasi Najib lebih buruk daripada penggantinya Tun Abdullah Ahmad Badawi.

Dr Mahathir berkata beliau berharap Najib mengambil pengajaran daripada pencapaiannya yang teruk dalam pilihan raya umum lalu tetapi nampaknya beliau tidak berbuat demikian.

Umno menang 9 lagi kerusi persekutuan tetapi gabungan Barisan Nasional hilang 7 kerusi dalam Pilihan Raya Umum ke-13. Gabungan itu kemudian memperolehi satu lagi kerusi menerusi pilihan raya kecil.

Menurut Dr Mahathir, banyak dasar, pendekatan dan perbuatan kerajaan pimpinan Najib "merosakkan hubungan antara kaum, merosakkan ekonomi dan kewangan negara".

Katanya, kelemahan Najib bermula apabila beliau melayan tuntutan musuh dengan memansuhkan Akta Keselamatan Dalam Negeri pada 2011 serta Akta Buang Negeri, yang memberi kuasa kepada kerajaan menahan sesiapa disyaki terlibat jenayah tanpa proses mahkamah.

"Jikalau tiada siapa yang sanggup menegur, biarlah saya menegur. Saya pernah dipecat oleh Tunku Abdul Rahman, dipulau Datuk Seri Abdullah dan difitnah ramai. Jika kerana menegur saya akan didera, terpaksa saya terima.

"Bukanlah saya tidak sayang pemimpin. Tetapi saya lebih sayang bangsa dan negara saya," kata Dr Mahathir.

Bagaimanapun, bekas timbalan perdana menteri Dr Mahathir yang pertama, Tun Musa Hitam berkata bekas majikannya itu akan hanya gembira jika ada seseorang yang seperti Dr Mahathir menjawat jawatan itu.

"Beliau hanya akan berpuas hati jika terdapat klon Mahathir yang menjadi pemimpin berkuasa di Malaysia," kata Musa dalam satu temubual eksklusif dengan The Malaysian Insider.

Selepas Najib dipilih sebagai pengganti Abdullah, Dr Mahathir secara terbuka memuji perdana menteri pilihannya itu dan menasihati Najib dalam banyak perkara.

"Tapi selepas Najib mula mentadbir mengikut caranya sendiri dan mengambil keputusan mentadbir tanpa gangguan, ia menjadi lebih buruk dan buruk kepada Mahathir.

"Mahathir berasa Najib tidak mendapatkan nasihatnya dalam isu yang penting tetapi dikatakan terpengaruh dengan orang luar," kata Musa.

"Itu adalah Mahathir, jangan percaya dengan kata-kata beliau mengatakan kritikan ke atas Putrajaya adalah bertujuan untuk nasihat yang baik.

"Matlamatnya adalah untuk menyingkirkan Najib dari Putrajaya," katanya. –

28 Ogos, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/ketua-umno-bahagian-berkumpul-esok-tanda-sokong-najib>